

RUN FOR UNITY - RASHTRIYA EKTA DIWAS

National Unity Day (Rashtriya Ekta Diwas) pualin tukin khan ramchhung hmun dang rualin Unity Run neih a ni.

Mipuite hnena inpumkhatna leh taksa sawizawi chawilar kawnga hmalakna Unity Run hi Aizawlah chuan zing dar 6 leh minute 15 ah tlan tan a ni a, Akashvani News Aizawl zawhna chhangin, Sports Authority of India (SAI) Director Pu Lianminthang chuan Aizawl bakah District hrang hrangah tukin hian insawizawiin an tlan tih a sawi a, mi 400 vel an kal a ni a ti.

India Deputy Prime Minister hmasa ber Sardar Vallabhbhai Patel pianchampha vawi 150-na puala ram puma National Unity Day (Rashtriya Ekta Diwas) puala hun hman hi SAI leh Sports & Youth Services tangkawp in a buatsaih a, Sports Department Director Pu H. Lalhmingthanga chuan Aizawl-a Unity Run-a tlan te chu Sikulpuikawnah a vailiam a, Upper Khatlaah tlanin, Assembly House thleng an tlan a ni.

SAI Director chuan Unity Day Run chu Fit India Run hmalakna kalzel a ni tih sawiin, a tum ber chu mipuite hnena inpumkhatna leh taksa hrisel nei tura insawizawi chawilar a ni a ti a, India inpumkhat chu a pawimawh hle tih sawiin, state leh ram te a chak dawn a ti a, fitness run a nih bawk avangin taksa hriselna atan a pawimawh a, mipuite chu an nitin nunah taksa sawizawi leh tlan te uar a, thil chin than a nei turin a chah a ni.



SAITUAL DISTRICT GST

Sawrkai laipuiin September 22 atanga Chhiah thar (GST 2.0) hmang tura thupek a chhuah hnuah Saitual district-ah mipui mamawh bungrua a man tlawma hralh awm bawk mahse, dawrkai zingah GST registration nei an tam loh avangin chhiah hniam hian langsar takin nghawng a neih hrih lo niin hriat a ni.

Hemi chungchangah hian Pu Michael Lalawmpuia Asst Commissioner of State Tax Saitual Zone chuan district thar a nih ang leh an hmalakna a la rei loh avangin tun dinhmunah dawrkai zingah GST registration drive an nei mek zel tih a sawi a. Dawrkai leh contractor GST registration nei awma ngaihte chu hma an lakpui mek tih a sawi.

Pu Michael Lalawmpuia chuan GST registration nei zingah pawh dan in a phut anga hma la tha tawh lo, GST Tax invoice issue loh vang te leh GSTIN signboard tar lote, hun pek chhung pawha hma la lote chu dan hnuaiah pawisa chawitir an nih thu a sawi a. Tin heng bakah hian bungrua cheng 200 chin chung lam hralh a nih chuan danin a phut anga GST invoice issue zel tur a nih thu sumdawngte chu an hrih tawh a, GST rate hlui atanga rate thar a awm hnua bungraw hralh dan an enchainah hmasawna an hmuh thu a sawi a ni.

Sumdawng, dawrkai leh contractor te chu GST registration nei vek tur leh bungraw lei leh hralh thua an tan pawh a him in lukhawng a nei zawk a, GST registration neih chu channa a ni lo tih hre thar leh turin Saitual district mipuite chu a chah bawh a ni.



PTC APPLICATION

Akashvani (All India Radio) Aizawl Regional News Unit chuan District hrang hranga thawk tur Part Time Correspondent (PTC) a la dawn.

Akashvani Aizawl Regional News Unit chuan PTC tur hi Aizawl, Hnahtial, Vairengte, Champhai North leh Chawngte ah te a la dawn a, kum 24 atanga kum 50 inkar Graduate tan November ni 14, 2025 thleng dilna thehluh theih a ni.

PTC dilna form hi News Section, Akashvani Aizawl pisa Tuikhuahtlangah lak theih ani dawn a, AIR News Aizawl Facebook page ah download theihin a awm bawh ang.

Hrechiang duh tan AIR News Aizawl Social media page ah leh phone number 8131823773 ah zawhfiah theih a ni.



SERCHHIP CLEANLINESS DRIVE

Serchhip District Bharat Scouts & Guides te chuan tukin zing khan Serchhip khawpui chhung tifaan an hnatlang.

Hnatlang hi tukin khan Serchhip Indoor Stadium tual zawlah an District President Pu Paul L Khuma, Serchhip Bawrhsap chuan a hawng a, Pu Paul L Khuma chuan faina hi mahni-ah a intan tur a ni, tiin, faina pawimawhzia Scouts & Guides ten a taka an nunpui theih nan a fuih a. Anmahni atanga intanin, an chhungkuaah te, an thiante zingah leh an school kalpui te zingah faina leh thianghlimna zirtirtu ni turin a sawm a ni.

Nasha Mukht Bharat Abhiyan (Drug Free India) neih nghal a ni bawkt a. Serchhip DC chuan ruihhlo tichhin ve ngai reng reng lo turin Scouts & Guides te chu intiam turin a sawm a, an dam chhung zawnga vawng nung reng turin a chah bawkt.

Scouts & Guides kalkhawm te hi hmun li ah inthen darhin Serchhip khawpui kawththler lun laia bawlhhlawh te an chhar khawm a. An bawlhhlawh chharkhawmte hi UD&PA bawlhhlawh paih motor-in a thiar khawm nghal a ni.



RASHTRIYA EKTA DIWAS

Vawiin hi India Deputy Prime Minister hmasa ber ‘Iron Man of India’ tia koh thin Sardar Vallabhbhai Patel piancham vawi 150-na a ni a. He ni pual hian ram pumah Rashtriya Ekta Diwas (National Unity Day) lawm a ni.

Prime Minister Narendra Modi chuan Gujarat-a Ekta Nagar a Statue of Unity ah Sardar Vallabhbhai Patel-a hriatrengna pangpar a dah a. Hemi hnu hian Rashtriya Ekta Diwas lawmnaah a telpui a. He hunah hian parade hrang hrang - BSF, CRPF, CISF, ITBP leh SSB atangin contingent-te bakah state police force hrang hrangte an tel a ni.

